



i-WIN LIBRARY

INTERNATIONAL
WAQAF ILMU NUSANTARA
LIBRARY

waqafilmunusantara.com
admin@waqafilmunusantara.com

i-WIN Library

Perpustakaan Internasional Waqaf Ilmu Nusantara

Office: Centre for Policy Research and International Studies (CenPRIS)

Universiti Sains Malaysia, Penang, Malaysia 11800

E-mail: secretariat.alamnusantara@gmail.com

admin@waqafilmunusantara.com

Visit us at: <https://www.waqafilmunusantara.com>

Title : Perbezaan Antara Kolonialisme Dan Imperialisme Dalam Konteks Penjajahan Ekonomi

Author(s) : Nurul Syafiqah binti Mohamad Rizal

Institution : University Sultan Zainal Abidin

Category : Article, Competition

Topics : History, politics

TUGASAN: Perbezaan Antara Kolonialisme Dan Imperialisme Dalam Konteks Penjajahan Ekonomi.

Nurul Syafiqah binti Mohamad Rizal

Secara umumnya kolonialisme dan imperialisme merupakan satu bentuk penjajahan namun sebenarnya tidak membawa maksud yang sama (Kheng, 1989). Makna penjajah ini bersesuaian dengan kolonialisme sahaja, akan tetapi imperialisme juga penting untuk merealisasikan kolonialisme. Hal ini kerana imperare dari Bahasa Latin bermaksud memerintah dan imperium pula membawa erti daerah pemerintahan raja (Manus., Nico Thamiend R. dan M.P.B., 2000).

Hampir tiga perempat dari negara dalam dunia ini telah mengalami pengalaman bagaimana negara tersebut dijajah. Pada zaman purba, telah wujud penjajah dari kerajaan Yunani, Mesopotamia, Mesir, Romawi, China, India, Parsi Dan Turki. Antara negara penjajah yang bermula pada zaman Renaissance sehingga zaman moden pula ialah portugis, Belanda, Rusia, British, Sepanyol, Perancis, Jepun, Amerika Syarikat dan Jerman (Hamid, 2010). Kuasa-kuasa tersebut bukan hanya menguasai politik semata-mata, namun ia juga melibatkan ekonomi, kebudayaan dan minda peribumi di tanah jajahannya.

Disebabkan masyarakat peribumi memiliki sifat nasionalisme yang mendalam, penjajah terpaksa menggunakan alasan yang paling kuat iaitu mengaplikasikan Teori Evolusi Manusia dari Charles Darwin dalam penulisannya yang berjudul *Polygenesis of the Species*. Mereka mengatakan bahawa Barat merupakan satu bangsa yang berada di atas puncak evolusi, manakala masyarakat yang primitif berada dibawah dan jauh ketinggalan dalam pelbagai aspek (Noriah Taslim, 1993). Oleh sebab itu Barat mengambil tanggungjawab ini untuk mentamadunkan bangsa yang mempunyai kulit yang berwarna termasuk Malaysia dan Indonesia. Pandangan ini disokong oleh tokoh-tokoh Barat seperti C. N. Morgan, Emile Durkheim dan Edward Taylor.

Kolonialisme bermaksud suatu paksaan dalam membentuk satu pemerintahan atas sebuah wilayah atau tanah jajahan atau satu usaha mendapatkan wilayah melalui penaklukan. Penaklukan sesebuah wilayah dilakukan secara langsung maupun tidak langsung, secara damai ataupun paksa dengan cara baik. Pihak kolonial akan menguasai barang dagangan dengan membelinya secara pukal bagi memastikan ekonomi berjalan dengan lancar dan sedikit sebanyak berusaha masuk campur dalam urusan pemerintahan dan akan berusaha menjadikan tempat tersebut sebagai tanah jajahan mereka. Negara yang dijajah meliputi aspek undang-undang, kehidupan sosial, pemerintahan dan sebagainya.

Koloni disini membawa erti tanah jajahan yang dikuasai oleh kekuasaan asing dan tujuan utama kolonialisme ini adalah demi kepentingan ekonomi semata-mata. Kebanyakan tanah yang dijajah memang kaya dengan bahan mentah.

Demi menjaga kepentingan perdagangan mereka daripada pergolakan politik yang mengganggu gugat sistem perdagangan, mereka terpaksa masuk campur tangan untuk menyelesaikan pertikaian atau sebarang masalah. Pada asalnya, kepentingan ekonomi menjadi keutamaan kolonial namun bertukar kepada penguasaan dan penjajahan politik atas faktor campur tangan yang mengganggu kelancaran perdagangan.

Kolonialisme mula berkembang selepas perang dunia pertama yang mana sejarahnya dibahagikan kepada tiga peringkat. Yang pertama bermula pada abad-15 sehingga Revolusi Industri tahun 1763. Yang kedua pula, selepas Revolusi Industri sehingga 1870-an dan yang terakhir adalah pada 1870-an sehingga 1914. 1941 ini merupakan puncak pertikaian kuasa-kuasa imperialis.

Dari sudut ekonomi British yang tertumpu di Negeri-Negeri Melayu Bersekutu pula, mereka cuba untuk melemahkan ekonomi negara-negara musuh khususnya kepada Jerman. Hal ini kerana Jerman merupakan satu penguasaan yang sangat besar dalam mengukuhkan ketenteraannya pada zaman perang sehingga ekonomi di Negeri Negeri Melayu Bersekutu

makin merosot dan secara tidak langsung dapat memperkuatkan penguasaan kolonial British. Bermula daripada itu, British sedaya upaya untuk menjatuhkan ekonomi Jerman dengan menggunakan seluruh pengaruhnya termasuk pengaruh di Negeri-Negeri Melayu Bersekutu kerana dengan kejatuhan ini sahaja mampu menguatkan pengaruh British di Asia Tenggara.

Tindakan British ini berlandaskan penggubalan enakmen yang disebut sebagai "*The Trading with The Enemy Enactment, 1914*". Enakmen ini menerangkan mengenai larangan mengadakan sebarang urusan jual beli dengan musuh seperti unsur jual beli, membekalkan barang dagangan dan sebagainya yang akan membuatkan musuh berpotensi mengaut keuntungan. Enakmen ini berikutan susulan daripada pengisytiharan King George yang menginginkan British dan negara jajahan yang lain supaya tidak berurusan dengan musuh.

Melalui urusan perdagangan eksport dan import pula, satu akta telah diwujudkan bagi membendung dasar ekonomi musuh yang berkembang pesat iaitu akta "*The Trading with The Enemy and Export of Prohibited Good Act, 1911*". Dalam akta ini juga menyatakan kesalahan-kesalahan terhadap mereka yang melakukan pemalsuan lesen perniagaan dan kepada sesiap yang mencurigai akan disoal siasat. Tindakan ini adalah untuk membanteras sebarang urusan dagangan dengan musuh terutamanya Jerman.

Selain itu juga British menggubal satu lagi akta "*The Custom (War Power) Enactment, 1916*" bagi membendung perdagangan musuh British dan Jerman serta mengawal semua aktiviti import dan eksport dengan menubuhkan satu jawatankuasa Pesuruhjaya Perdagangan dan Kastam. Bagi memusnahkan ekonomi Jerman, British telah mengeluarkan satu kenyataan mengenai pemintasan perdagangan laut Jerman untuk melumpuhkan ekonomi mereka. Apabila kapal-kapal perdagangan ingin memintas jalan, mereka perlulah menunjukkan penyataan yang dikeluarkan oleh British bagi mengelakkan sebarang cubaan penyeludupan melalui kapal musuh.

Kolonialisme itu sendiri telah membawa kepada penguasaan British yang sangat ketara pada zaman itu. Melalui penguasaan politik pula, British berjaya menarik masyarakat untuk setia dengan British sekaligus membolehkan British menggubal pelbagai akta untuk membendung pengaruh luar yang cuba untuk berkembang di Negeri-Negeri Melayu Bersekutu. Pengaruh ekonomi ini sedikit sebanyak membantu British untuk melawan musuh seperti Jerman itu demi penguasaan terhadap tanah jajahannya.

Pada peringkat pra penjajahan, Tanah Melayu mempunyai ekonomi yang semakin berkembang pesat. Semenanjung Tanah Melayu mempunyai kedudukan yang strategik seperti di laluan Selat Melaka, serta muara sungai yang sesuai untuk beroperasi sebagai pelabuhan semula jadi, telah menarik perhatian kepada penduduk setempat untuk bergiat secara mendalam dalam bidang perdagangan. Disamping itu, faktor utama yang berlakunya kepesatan ekonomi ketika itu adalah kerana wujudnya zaman kegemilangan kesultanan Melayu Melaka dengan kemunculan kota Melaka telah menjadikan Melaka sebagai sebuah pelabuhan entrepot yang menunjukkan kebolehan penduduk dan pemerintah menguruskan sistem ekonomi pada ketika itu.

Satu permulaan yang baru apabila kuasa-kuasa barat mula masuk campur di Tanah Melayu semasa kejatuhan empayar Melaka ke tangan Portugis. Kuasa barat berebut mencari tanah jajahan yang baru bagi bertujuan untuk meningkatkan pengaruh politik, hasil perdagangan dankekayaan mereka. Laluan perairan di Selat Melaka dan sekitar kawasan Melaka telah menguatkuasakan sistem cukai yang dikawal oleh Portugis dengan jayanya.

Masuk campur antara kuasa-kuasa Eropah dengan Tanah Melayu ini telah membuatkan Tanah Melayu mengalami perubahan setelah termeterainya perjanjian Inggeris-Belanda (1824). Pihak kolonial Inggeris berjaya meluaskan perdagangannya di Tanah Melayu dan kemasukan buruh dan perdagangan semakin meningkat dengan membuka beberapa pelabuhan di Labuan, Jesselton, Singapura dan Pulau Pinang. Aktiviti ekonomi masa itu hanya

berfokuskan kepada perlombongan, pertanian dan perdagangan. Hal ini membuatkan ramai pelabur-pelabur, pedagang-pedagang dan buruh-buruh imigran yang datang ke Negeri-Negeri Selat. Pada hujung abad ke-19, kawalan politik Inggeris telah memberi kesan ke atas kedudukan ekonomi Tanah Melayu dimana wujudnya Perjanjian Pangkor (1873) yang membuatkan Inggeris mempunyai hak untuk mengutip hasil yang diperoleh, maka terhasilnya pelbagai infrastruktur bagi pengukuhan dasar pecah dan perintah, wujudnya sistem jalan raya dan keretapi di pantai barat semenanjung dan pembukaan ladang pertanian di negeri-negeri jajahan Inggeris.

Semasa Perang Dunia Kedua, Inggeris telah mula memberi penumpuan yang lebih kepada pengeluaran bijih timah dan getah menjadikan kegiatan eksport menjalankan peranan yang sangat pada ketika itu. Selain itu, Inggeris juga mula memberikan tumpuan yang baik kepada sektor ekonomi ketika Semenanjung Tanah Melayu diletakkan di bawah persekutuan (1948-1956) namun masih tiada perubahan ekonomi akibat daripada Perang Dunia Kedua.

Imperialisme mula diperkenalkan pada tahun 1830 di Perancis. Istilah ini menerangkan perluasan kekuasaan yang dilakukan oleh pihak Inggeris. Mereka telah banyak menguasai wilayah Afrika dan Asia dengan menganggap mereka yang paling berkuasa dan mengaburi mata tanah jajahan dengan mengatakan ingin membangunkan masyarakat yang dijajah yang masih ketinggalan dibelakang demi kebaikan dunia.

Imperialisme boleh dirujuk sebagai sistem pemerintahan bagi mengawal dan menguasai negara-negara yang dianggap mundur dengan cara mengeksploitasi sumber-sumber negara tersebut bagi menambahkan hasil ekonomi kerana hasil yang mereka perolehi tidak mencukupi untuk menampung penduduk negara mereka.

Selain penindasan yang dibuat oleh imperialis atas tanah jajahan, mereka juga menjadi pendorong yang meyumbang kepada pembinaan sesebuah negara bangsa seperti pembawaan sistem perundangan, kesihatan, pendidikan dan sistem pemerintahan.

Imperialis beranggapan ianya menjadi satu tanggungjawab bagi mereka untuk menyelamatkan manusia daripada penindasan dan ketidakadilan yang berlaku. Imperialisme terbahagi kepada dua iaitu imperialisme kuno yang berlaku sebelum 1870 dan mula menguasai ekonomi, kejayaan dan agama.

Imperialisme moden bermula selepas Revolusi Industri di Inggeris pada 1870. Negara-negara Eropah berlumba-lumba untuk mendapat tempat ditanah jajahan Afrika, Amerika dan Asia sebagai tempat untuk mereka memasarkan hasil perindustrian. Dasar imperialisme ini sebenarnya dilaksanakan demi agama dan mereka menganggap bahawa mereka mempunyai tugas agama untuk menyelamatkan manusia dari segala ancaman ketidakadilan dan penindasan yang berada dalam negara-negara yang mundur. Paderi Kristian menganggap misi penyelamat ini sebagai *The White Man Burden*.

Imperialisme pada zaman moden sejak dua puluh tahun selepas berakhirnya abad ke-19 masih tetap menjadi imperialisme cuma ditukar daripada kuno kepada moden. Tetapi tidak mempunyai perbezaan yang ketara, hanya beza dari segi bentuknya sahaja. Pembahagian negara Afrika sebenarnya dibahagikan oleh Barat kerana tingkat keupayaan negara tersebut tidak mencapai tahap maksima. Ketika orang Eropah sibuk mencari tempat baru untuk dijajah, barat mula menduduki daerah selatan benua Afrika yang pada ketika itu merupakan tunjang pengharapan mereka. Penempatan mereka di Afrika itu adalah sebagai tempat perhentian bagi kapal-kapal dagang Belanda.

Pada tahun 1880, negara-negara Eropah Barat seperti Jerman, Perancis dan Inggeris menyerbu daerah-daerah Afrika yang masih tidak dijajah dan terus menguasai tempat tersebut. Mereka melakukan perundingan serta perjanjian untuk penempatan yang mereka duduki sehinggakan sebelum Perang Dunia Pertama, Afrika telah dibahagi-bahagikan semuanya kecuali Ethiopia dan Liberia sahaja. Semasa imperialis Barat berjaya menguasai benua Afrika,

terdapat tanda-tanda kemerosotan yang berlaku kerana imperialis Barat sebenarnya bersifat bebas bersaing dan melakukan persaingan yang sangat hebat.

Ekonomi merupakan satu sistem yang paling banyak memberi kesan kerana memang itu tujuan utama bila para imperialis ingin menjajah negara tertentu. Imperialis telah mengaut kekayaan negara yang dijajah dengan mengambil bahan-bahan mentah seperti contoh di negara Afrika, hasil buminya semakin berkurang disebabkan golongan imperialis ini. Mereka juga turut menggunakan tenaga buruh paksa yang dipaksa oleh imperialis dan membuatkan negara Afrika semakin menderita dan miskin manakala imperialis semakin kaya. Walaupun wujud berkembangan sistem kapitalis, namun kadar kemiskinan terus naik mendadak dan berlaku eksploitasi sumber alam dan manusia secara besar-besaran. Benua Afrika merupakan pusat kekayaan bagi imperialis dan rakyat Afrika menjadi miskin kerana industri imperialis lagi besar berbanding perniagaan bangsa jajahan.

Kesimpulannya, apabila berlaku penjajahan, maka wujudnya persaingan antara penjajah untuk meluaskan kuasa ekonomi, politik, sosial dan sebagainya. Cara sebegini membuatkan masyarakat peribumi yang dijajah mula memiliki sifat nasionalisme yang tinggi dan menimbulkan rasa kemarahan dan kebencian yang mendalam terhadap penjahannya. Penjajahan seperti ini akan memberi kesan kepada penduduk tempatan sehingga mereka terpaksa hidup dalam kesengsaraan di negara sendiri. Kolonialisme dan imperialism memberi perbezaan yang berbeza walaupun masih dibawah konteks penjajahan. Apabila imperialis telah mengaut keuntungan di negara jajahannya, maka mereka akan meninggalkan negara tersebut tanpa sedikit kebaikan serta keuntungan bagi tanah jajahannya. Konsep ini berbeza dengan kolonialisme kerana para kolonial akan meninggalkan legasi seperti sistem pendidikan, sistem ekonomi yang mereka terapkan semasa dibawah jajahannya. Hal ini kerana supaya penduduk tersebut dapat meneruskan legasi serta ianya memberi kesan kerana penduduk tempatan

terpaksa mengikuti atau mengekalkan cara pihak kolonial walaupun telah dijajah, tetapi penduduk masih boleh merasai menjadi pemerintah di negara sendiri.

Rujukan

- Hamid, R. A. (2010). *Fiksyen Poskolonial: Yang Menjajah dan Dijajah*. Kuala Lumpur: Dewan Bahasa dan Pustaka.
- Kheng, C. B. (1989). “Imperialisme dan Kolonialisme: Beberapa Pandangan”. *Kolonialisme dan Imperialisme: Satu Tinjauan Sejarah*.
- Manus., Nico Thamiend R. dan M.P.B. (2000). *Sejarah*. Jakarta: Penerbit Yudhistira.
- Noriah Taslim. (1993). *Teori dan Kritikan Sastra Melayu Tradisional*. Kuala Lumpur: Dewan Bahasa dan Pustaka.
- Ab Rahman, H., DAUD, M. B., & AHMAD, N. B. (2009). Pembangunan Ekonomi dalam Hubungan Etnik. *Hubungan Etnik di Malaysia: Perspektif Teori dan Praktik*, 185-198.
- Rahim, R. A. A., & Kahal, S. M. B. (2017). Ilmu kolonial dan Islamisasi alam Melayu: analisis kritikal. *SEJARAH: Journal of the Department of History*, 26(1).
- Hamid, R. A. Sastra dan Penjajahan: Membaca Karya Pengarang Tersohor Indonesia dan Malaysia.